



庶齋老學叢談中

從仕郎崇明州判官致仕盛 如梓

今之揚州秦為廣陵漢為廣陵郡揚州治所或在歷陽或在壽春或在建康廣陵皆非所統隋開皇初改為揚州即今寶祐城周三十六里曰吳王濞之都也今揚州城乃後周顯德五年于故城東南隅改築周二十餘里大市東南角俞生家穿井猶有船版路學採芹亭後開阮院得岍椿棗羅木教授劉青溪取為器用郡城曰草塞河道平阜成街市理勢然也如開

明橋之類皆曰舊從置

廬江郡制載淠湖事昔有巫媪居縣有老叟曰石龜
口出血此地陷湖未幾有人以猪血置龜口巫媪見
之南走其地遂陷然東漢永平十九年秋七月淠湖
出黃金注淠子小反縣名在合肥東南則城陷之說妄矣西南
夷邛都縣地陷為湖同名邛池注引李膺益州記邛
都縣有老姥家負每食有小蛇在牀姥憐而食之後
長丈餘令有駿馬蛇吸殺令怒殺姥蛇為姥報仇每
夜聞風雷之聲四十餘日百姓相見咸驚語汝頭那

戴魚是夜方四十里俱陷為湖唯姥宅無恙至今猶
存淠湖地陷並緣於此

禹門化龍詩家常用白樂天有龍門點額意何如之
句類書引三秦記河津一名龍江門門海大魚集其下不
得上上即為龍中州士夫言誠有點額者今三門折
津也然後漢書交趾郡封溪有龍門水深百尋大魚
登此化成龍不得過曝腮點額血流此水常丹杜詩
中有之龍門亦有之
初用之才登州人居之果島嘗為江淮行省都事薦

實向學純古君子也母老不仕以孝廉旌表嘗有音
問往來數年前聞島上有墓不知年代包髡如新俗
稱康王墳余以史傳考之陳氏篡齊之後以海上二城
為康公經老此其葬地也回勉之於每歲春秋集好
古君子於墓前澆奠之亦厚德之舉昨用之書至云
年來已成故事矣

書籍板行始於後唐昔州郡各有刊行文籍寰宇書
目備載之雖為學者之便而讀書之功不及古人矣
况異書多泯沒不傳後漢書注事最多所引書今十

無二三且如漢武秋風辭見於文選樂府文中子晦
菴附入楚詞後語然史記漢書皆不載藝文志又無
漢祖歌辭不知祖於何書

吹劍錄謂廣陵散為王陵母丘儉諸葛誕相繼為揚
州都督謀興復魏室皆為晉誅以廣陵為揚州魏之
敗散始於此不知魏昔之際揚州治所在壽春與廣
陵無干涉魏史所言地如百尺如丘頭如安風津皆
非魏之地也散乃曲名如操弄之類潘岳笙賦云流
廣陵之名散是也韓皋審音既失考于其前俞公著

書復承訛於其後

武昌瀕江有呂公磯上有黃鶴樓一日有題漢宮春
於其上云橫吹聲沈倚危樓紅日江轉天斜黃塵邊
火瀕洞何處吾家胎禽怨夜半乘風玄露丹霞先生
笑飛空一劍東風猶是天涯 情知道山中好早翠
鷺含隱瑤草新芽青溪故人信斷夢馳車乾坤星火
歸來子煮石煎砂迴首處幅巾蒲帳雲邊獨笑桃花
不知為何人作或言洞賓語也後三年己未大元渡
江

外舅制準華公說

王明清揮塵錄載紹興初劉大中以監察御史宣諭
諸路回宰臣以其稱職擬除殿中侍御史高廟云且
除秘書少監啟其所以曰大中所至多興獄尚有未
決者一除言路外方觀望恐累及無辜紹興三年知
藤州侯彭老言本州賣鹽寬剝錢一萬貫買到金一
百六十餘兩銀一千八百兩投進詔云縱有寬剝自
合歸之有司非守臣所得進納或恐剝取媚朝廷
侯彭老降一官放罷以懲妄作所進物退還
杜祁公衍相仁宗為人清儉平生非會客不食羊肉於

時朝多恩賜請求無不從祁公每抑遏之所請即封
還有私謁者上上必曰朕無不可但這白鬚老子不
肯

景祐三年五月詔中外百僚許以家書附通明告中
外下進奏院後以為法放翁得子虞濠上書詩云日
暮坐柴門懷抱方煩紆鈴聲從西來忽得濠州書

姚將軍靖康初以戰敗亡命炎建中下詔求之不可
得後五十年乃從呂洞賓劉高尚往來名山有見之
者放翁感其事作詩題青城山上清宮壁間云造物

困豪傑意將使有為功名未足言或作出世資姚公
勇冠軍百戰起陣西天方覆中原殆非一木支脫身
五十年世人識公誰但驚山澤間有此熊豹姿我亦
志方外白頭未逢師年來幸廢放倘遂與世辭從公
遊五岳稽首餐靈芝金骨換綠髓歛然雲外飛
靖康建炎間閔中奇士趙宗印提義兵出戰有衆數
千所向輒下敵不敢當會王師敗於富平宗印知事
不濟大慟於王景略廟畫以金帛散其下披髮入華
山不知所終放翁感其事作詩曰我夢遊太華雲開

千仞青擘山瀉黃河萬石仰巨靈往者禍亂初氛祲
干太寧豈無卧雲龍一起奔風霆時事方錯繆三秦
盡羶腥山河消王氣原野失天刑將軍散髮去短劍
斲茯苓定知三峰上爛醉今未醒二事頗相類惜姚
將軍不得其名後之作史者不知錄耶否耶賴有陸
詩傳於世其詳當考之高廟實錄

周平園玉堂雜記云草后妃太子宰相麻硯匣壑尺
筆格糊板水滴之屬計金二百兩既書除日隨以賜
之乾道以後止設常筆硯退則有旨打造不及賜牌

子金一百兩立后升儲則倍其數紹興二十四年王
公綸暫權內制草劉婉儀進位貴妃制高宗稱其有
典誥體潤筆萬緡賜尤奇

南軒先生除左司孝宗諭以直宿云以此處鄉無他
要鄉夜間來說話先生曰某須直宿夜對多賜坐一
夕上曰朕今日觀書至某處以朕思之其義如此鄉
以為何如某對曰聖見高明固已精到然向上思量
猶有意思曰奏其說云々上大喜每夕必舉數端見
問某所對不是好勝只要人主致思不已天下之理

無窮愈思索愈有意思

宋官制載嬪御久不得遷屢有干請上奏以無典故朝廷不肯行或對曰聖人出口為勅誰敢不從上笑曰汝不信試為降旨政府政府奏無法上收以示嬪御曰凡事必與大臣會議方為詔勅或有只請御筆進官者上取綵牋書某官某氏特轉某官衆忻謝而退至給俸時各出御書請增俸有司不用退還漫訴於上前上笑曰果如是諸嬪對上毀其御書曰元來使不得上笑而遣之時咸服仁宗之聖斷

趙太祖山陵金之末年河南朱漆臉等發掘取其寶器又取其玉帶重不可得乃以繩穿其背扎穿於上自己坐而秤起之帶始可解為口中物噴於臉上洗之不去人因呼朱漆臉後負帶於汴識者知為陵寢寢中物敗露皆杖死

田君集說

揚起宗說汴京熙春閣歷金國不毀有詩題於上云一閣看來盡鬼工太平天子侈心雄連天老蜃千氣年跨海金鵬兩翅風人說來從塵世外天教不墮劫灰中寢寂莫熙春字猶帶斜陽照故宮余謂必通

好時使呂經遊而題厭次劉景陸來為憲幕叩之云
王嘉甫國賓詩也

三衢志云吳越錢王祖瑩開化縣雲臺北原初錢氏
微時有子為人負擔至此其主人明地理曰流水九
曲列岫如屏葬此子孫當有興者取竹枝標識之翌
日命錢子往視之竹已根遂伐去給其主曰無所謂
竹矣潛以其父母骨瘞之於此今猶有倒生藤拂墓
域樵人以刀斷之膏液如丹

徐偃王事衢新刊郡志不得其實按徐氏世譜乃王
之三十七世孫元泊公避陽朔之亂徙居江浙隨處
建祖廟不獨雲山他處亦有編類不得其人余以致
仕歸不及訂正矣

張寓軒先生說長平之坑至今猶有白骨沈存中亦
云城父縣乾谿章華臺故基徃徃得楚靈王戰士之
骨慕容垂叅合陂之敗積骸如山夏主勃之勃殺俘檀人
積屍踰髑髏臺倭之竹島曰骷髏山

穎濱古史論曰善乎子夏之教人也始乎灑掃應對
進退而不急於道使來者自盡於學日引月長而道

自至孔子曰君子上達小人下達之達有上下出乎
其人而非教之力也今世之教者非性命道德不出
乎口雖禮樂刑政有所不言而况於洒掃應對進退
也哉

葉水心曰今世學者以性為不可不言命為不可不
知凡六經孔孟之書無不牽合其論而上下其辭精
深微妙茫然不可測識而聖賢之實猶未著二公之
說若合符契皆有所謂

前輩云學貴知要不在貪多用貴適時不專泥古

王狀元十朋讀禮堂記云為仕者未嘗不讀書能讀
而不能行是猶鳳鳴而鷲翰雖胸中有萬卷身為行
秘書謂之不讀書

康節曰學不至於樂不可謂之學又曰學在不止故
文中子云沒身而已即曾子死而後已之說

學貴有常而悠：害道循序而進與日俱新須以人
形已自課其功然後有所激於中勇果奮發不能自
已

司馬溫公曰某視地然後敢行頓足然後敢立

劉極齋蜀人名宏濟遇誕日必齋沐焚香曰父憂母
難之日此守伊川生日不事飲宴之說雷龍困說

東萊曰治言而不治氣雖有正禮大義反為奮怒所
敗不足以解紛而失和氣豈不甚可惜哉

鄒道鄉曰多言不如寡言寡言不如不言和緩而言
則有條理而人不厭可以交可以毋交交多濫

元城先生作孫莘老寄老菴記有云惟賢者未嘗不
諒已而受任未嘗不畏滿而知止又云凡居地土者
莫非寄也寄則非我知非我則無所攀戀故無往而

不逍遙烏乎寄老於軒冕富貴之間者危殆傾攷之
患日至寄老於山林泉石而人莫與之爭可謂知所
寄矣不亦仁且智哉

南軒先生曰為學不可全恃明快要當思量到遲鈍
處問如何却要遲鈍曰一向從明快中去豈不有失
須反復致思故遲鈍中下工夫然後能有諸已

項平菴曰人生一世豈能獨佚但當明其不可息之
說而勉吾之倦則所遇無險易而安矣又曰處事者
必驗之心自心不安則人心不服人心不服則已不

得安又曰讀書現物必盡用以治己則不枉用功
先儒用貞志苦心之士如飢不忘食渴不忘飲病不
忘醫流落不忘故鄉求一日之安不可得豈肯悠悠
玩歲月邪又曰日用應酬無非是學但有主則明無
主則昏又曰下學而上達其事則下學之事其理則
上達之理一進則俱進此三則皆足為學者立懦志
開迷途

陸賈新語云長於變者不可窮以詐通於道者不可
驚以恠審於辭者不可惑以言達於義者不可動以

利是以君子廣思而博聽進退循法度動作合禮儀
聞見欲衆而采擇欲謹學問欲博而行已欲敦

先儒云詳於法者有法外之遺奸工於術者有術中
之隱禍

學貴乎問聖賢立教及經書所言不一而止晦庵先
生無書不讀啟棘賓商猶作書與誠齋托轉問於周
平園先儒為學其勤篤好問乃如此

晦菴先生云劉元城與劉壯輿說某人字畫不正必
是心術不明年來後生寫字多欲破體不思東晉時

江東分王元氣圻裂風俗澆漓清談誤國字畫何取
盛唐及宋初諸公字畫重厚何嘗破體今或多或少妄
為增減佩觿集云點畫之間有閑造化况一點一畫
不同聲音便別歐陽公嘗言所謂法帖者率皆弔喪
問疾叙睽離通問訊施于朋友不過數行而已高文
大策何嘗用此甚至刊為字本以誤學者牧庵姚公
近刊五經文字于寧國路學正教之意深矣
古人每觀人以舉動瞻視之間而知其心事關伯比
謂莫敖必敗舉趾高心不固矣鄭伯如晉拜成授玉

士貞伯曰鄭伯其死乎視流而行速宜不能久史駢
曰使者目動而心肆懼我也締疵謂智伯曰韓衛二
子視呂端而趨疾知呂得其情孟嘗君謂公孫戍子
何足之高志之揚成以象牀之事對如此類多姑舉
此數事前漢五行志言之尤詳

方蛟峯八字格言富莫大於蓄道德貴莫大於為聖
賢負莫大於不聞道賤莫大於不知耻仕能行道之
謂達負不安分之謂窮流芳百世之謂壽得志一時
之謂夭

前輩有云讀書生計疎耕田子孫愚二者不偏廢家傳為永圖此意甚好士以耕讀為上屢見棄田謀富被誤多矣

大兵南下時疊山謝先生率眾勤王潰散而遁兵至上饒拘謝母必欲得其子母曰老婦今日當死不合教子讀書知禮義識得三綱五常是以有今日患難若不知書不知禮義不識三綱五常那得許多事老婦願得早死且語言雍容略無愁嘆之意主者無如之何遂釋之

鉛山葉有大說

柳仲塗云古文非在辭混言苦使人難讀誦之在於古其理高其意隨言語短長應變制作同古人之行事是謂古文

張文潛云自唐以來至今文人好奇者不一甚者或為缺句斷章使脉理不屬又取古人制訓誥希於見聞者衣被而說合之或得其字不得得其句或得其句不知其章反復咀嚼卒亦無有以寡文之陋也史記之文其意深遠則其言愈緩其事繁碎則其言愈簡此得春秋之義

柳子厚設漁者對智伯效國策莊辛對楚襄王辛之
喻入蔡靈侯其事襄王共五段子厚亦三喻引太公
遇文王發智伯之問以三脚證前凡六段文字比國
策尤縝密但結尾於文王何有下說智伯處比國策
似乎猶欠五峯假陸賈對皆竟舜三代之事與二者
不同議論正大規模宏濶後分九段包括漢事無遺
誠為傑作不可一槩觀

昔嘉定沈宰璞論作文以艱得之以艱出之其文必
澁以艱得之以易出之其文必平以易得之以易出

之其文必率

李方叔言人之文章濶達者失之太疎謹嚴者失之
太弱

昌黎荅張籍書夫子之言曰吾與回言終日不違如
愚則其與衆人辨也有矣東萊批使事牽引以無為
有同彼借此才使正事便不是此文字所以好旁影
甚佳東坡范增論說羽弒義帝增必力爭而不聽正
用此法送文暢序結句連下五個也字如破竹一段
工夫極大

柳文晉文公問守原議中云不公議於朝而私議於
宮不得謀於鄉相而獨謀于侍人東萊批說朝與宮
鄉相與侍人下四句不合事所謂異樣不俗下承上
况其時當不乏言議之臣乎此一句生下句亦應鄉
相如貫珠

東坡扶蘓論云戾太子豈欲反者哉計出於無聊也
此句最響乃用史記吳王濞傳恐上誅之計乃無聊
積威信之劇即太史公積威約之漸句短法同而意
殊耳

晦菴先生謂歐蘓文好處只是平易說道理初不曾
使詫異底字換却尋常的字又曰作文字須是靠實
說不可駕空細巧大率七八分實二三文分歐文好
者只是靠實而有條理

俞堪隱云文字且要體面平時習為締繪工夫氣象
淺促手段拘攣他日官達凡議論奏疏代言則不能
脫此拘局矣

陳同甫作文之法曰經句不全兩史句不全三不用
古人句只用古人意若用古人語不用古人句能造

古人所不到處至於使事而不為事使或似使事而不使事或似不使事而使事皆是使他事來影帶出題意非直使本事也若夫布置開闔首尾談貫曲折關鍵自有成模不可隨他規矩尺寸走也

放翁與兒輩論李杜韓柳文章絕句云吏部儀曹體不同拾遺供奉各家風未言看到無同處看到同時却有功示子詩云六藝江河萬古流吾徒鑽仰死方休沛然要似禹行水卓爾孰如丁解牛老憊簡篇猶自力夜深燈火自當謀大門舊業微如綫賴有吾兒

共此憂時公七十九歲矣又云得道如良賈深藏要若虛孤學詩云家貧占力量夜夢驗工夫已上數詩皆有益學者玩味

晦菴象山二先生不惟以書往復辨無極鵝湖倡和尤見肯趣象山詩云墟墓生哀宗廟欽人千古最靈心消流積至滄溟水拳石崇成太華岑簡易工夫終久大支離事業竟浮沈欲知自下升高處真偽先須辨古今晦菴次韻云德義風流夙所欽別離三載更關心偶扶藜杖過寒谷又枉藍輿度遠岑舊學商量

加邃密新知培養轉深沉只愁說到無言處不信人間有古今以上中之上

漢唐盛時文章之秀萃於中原其次漢淮其次偏方且如廣陵建安七子始有陳琳晉五俊始有閔鴻張華見而竒之曰皆南金也唐有李邕章彝宋有秦觀孫覺孫洙是皆昭昭然人之耳目者南渡後專尚時文稱閩越東甌之士山川之氣隨時而為衰盛談風水者烏能知此唐詩人江南為多今列於後陶翰許渾儲光羲皇甫冉皇甫曾沈頌沈如筠殷遙潤州人三包

融何佶戴林倫金壇人陸龜蒙于公異丘為丘丹顧况

非熊父子沈傳師誠之父子蘇州人三羅虬鄴隱章孝標

章碣杭州人孟郊錢起沈亞之湖州人施肩吾章八元徐凝

李頻方干睦州人賀德仁吳融秦系嚴維越人張志和婺人吳

武陵王貞白信州人王昌齡劉昫虛陳羽項斯江東人張喬杜

荀鶴池州人劉太真顧蒙汪遵宣州人任濤來鵬豫章人李羣公

王禮禮人李濤胡曾長沙人皆有詩名以下中之下

杜工部岳陽樓詩放翁以為妙絕古今余讀暮秋將歸秦留別湖南親友詩不覺涕之無從况歸秦之愿

不遂而客鳥如日長惟鳥雀春暖獨柴荆感時花濺
淚恨別鳥驚心荒庭垂橘柚古屋畫龍蛇皆寓事于
題禹廟甚切青青竹筍迎船出白白江魚入饌來皆
養親事于扶侍事切使事如不使事如桑麻深雨
露燕雀半生成前輩之說未當殊不知此就句中對
集中此法甚多如獻納開東觀君王問長卿風物悲
遊子登臨憶侍郎不知雲雨散虛費短長吟洒落君
臣契飛騰戰伐新餘不具述七言如桃花細逐楊花
落黃鳥時兼白鳥飛戎馬不如歸馬逸千家只有百

家存三分割據紆籌策萬古雲霄一羽毛千狀萬態
不以一律拘也

杜詩速宜相就飲一斗恰有三百青銅錢王荆公歌
元豐云百錢可得酒斗許雖非社日嘗聞鼓吳兒踏
歌女起舞但道快樂無所苦元豐酒價比天寶僅三
之一其樂如此

武元衡相憲宗工五言詩夏夜嘗有吟云坐久喧暫
息池臺惟月明無目駐清景日出事還生

杜牧官於金陵寄揚州韓綽判官詩青山隱隱水迢迢

迢秋盡江南草未凋二十四橋明月夜玉人何處教
吹簫草未凋今作草木凋不見江南草木經寒之意
教吹簫作不吹簫金陵志謂此詩說金陵二十四航
也揚州二十四橋之名猶載夢溪筆談教字見寄揚
州之意

郭汾陽功名富貴炫耀史冊及觀趙蝦經汾陽舊宅
詩云門前不改舊山河破虜曾經馬伏波今日獨經
歌舞地古槐疎冷夕陽多前日之赫赫已寂寂矣
韓致光以章之際遇昭宗君臣相得款大用之值朱

溫將篡非獨力能支去位而已不然徒死無益觀致
光過湖湘食櫻桃詩今人淒然時節雖同氣候殊未
知曾薦寢園無合充鳳食留三島誰許鴛偷過五湖
苦 恐難同象七酪漿無復瑩蠟珠金鳶歲歲長宣
賜忍淚看天憶帝都意與少陵同尤媿婉黃竹外有
讀韓偓傳詩堂陞中間飛塵戰君臣相顧淚沾巾百
年富貴輸前輩一旦艱危屬老臣自古舟中為敵國
從今君側已無人酬恩報主他生事偷向蠻夷老此
身

有以詩集呈南軒先生曰詩人之詩也可惜不禁咀
嚼或問其故曰非學者之詩學者詩讀著似質却有
無限滋味涵咏愈久愈覺深長又曰詩者記一時之
實只要據眼前實說古詩皆是道當時實事今人作
詩多愛裝造言語只要開好却不想一語不實便是
欺這上面欺將何往不欺

廣陵高爽博學多才故人孫抱為延陵令爽詣之抱
了無故情爽取筆書鼓云徒有八尺圍腹無一寸腸
面皮如許厚受打未渠央

出南史
卡彬傳

羅鄴望仙詩千金壘土望三山雲雀無蹤羽衛還君
說神仙求使得茂陵何事在人間可為偽服食偽學
者之戒

張橘軒與元遺山為斯文骨肉張云富貴倘來良有
命才名如此豈長貧元改倘來為逼人如此為如子
又云半篙溪水夜來雨一樹早梅何處春元曰佳則
佳矣而有未安既曰一樹烏得為何處不如通作一
句改一樹為幾點壬辰北渡寄遺山詩萬里相逢真
是夢百年垂老更何鄉元改里為死垂為歸如光弼

臨軍旗幟不易一號令之而百倍精采

揚慈湖道學老儒有詩云莫學唐人李杜癡作詩須
作古人詩世傳李杜文章伯問着閔睢恐不知李杜
讀書破萬卷豈不知閔睢之義好議論而失言矣
靜修文集讀史詩云紀錄紛紛已失真語言輕重在
詞目若將字字論心術恐有無邊受屈人殊非確論
修史自有定例謂如其人功十而過一本傳不書其
過十功豈不能贖一過其過必於他傳見之其人過
十而功一本傳必書其功謂其人豈無一善可書或

有當書之事本傳不載者必於他傳見之其例甚多
未易縷陳諸儒史說備見之又詠曾點云獨向舞雩
風下來坐忘門外歆生苔婦時過著顏家巷說與城
西花正開此尤非也坐忘乃莊子之說借孔顏之名
以形容道妙非孔門實事以此求顏子則誤矣未可
以私意立說輕於訾毀聖賢况顏子與聖人僅隔一
塵城西之花豈足動其心語意大欠治擇近臨江前
輩著古史諸詩鑒論之尤詳

陳伯通宣慰雲中人跛而眇自述云肢傷一體委師

德目眇三分李鴈門有海青馬生駒詩頗工金符
飛下渥注龍鞭影輕搏六翮風耳竅風聲聞閉蟻眼
花雲影疾驚鴻未容駿骨遼東老已得英名冀北
空一縷紅塵江漢捷天庭不為荔枝紅催薦中厨語
未開控拳豪客簇雕盤翠翻雲葉并刀亂冰透霜
花楚玉寒一吮味甘牙齒滑十分香散鼻頭酸夢
魂不到鱸魚膾醉眼江湖特地寬驚呼乳盜意忽忽
便覺餘香鼻觀通露滴水盤藍玉軟風生霜刃碧囊
空舞娘驚濺羅衣綠酒客潛消醉臉紅若使昔人知

此味羊頭爛煮不成功

左丞崔公仲文斌弘州人資兼文武重道崇儒統兵
平湖湘時潭帥李閒齋芾城將破舉家自刑繼之以
火忠義大節天下咸知公以詩弔云憶昔司空撫
御牀祖龍未死國先亡
致使南州總戰

場湘水一川骸骨滿閒齋千古姓名香我來不見先
生面獨對西風酌一觴李西山使交趾道繇長沙六
弔云天道由来有廢興義無兩大一身輕封疆社
稷若不死婦女鬢眉安用生紐解三綱重接續灰

寒萬劫獨光明便當配食三閭廟啟迪民彝見
太平

廬陵胡貫齋挽文山二詩裂指秋風感別離乾坤人
物太奇奇生為孝子忠臣勸死結皇天后土知萬折
江流魚腹石千年人音耆陽碑一門史氏春秋筆愁
絕湖光入西時金骨神仙玉色人千霜萬雪見吾真
聖賢盡節心弥壽天地為棺道不貪河漢橫流豪傑
淚風霆吼鬼神嗔先生出入騎箕尾長現綱常四
大身

太常徐威鄉挽文山詩大元不殺文丞相君義臣忠
而得之義若漢王封齒日忠如蜀將斫顏時乾坤德
澤華夷見山斗威名草木知只恐史官編不盡老夫
和淚賦新詩

張寓軒相公少年與孫德謹於東平嚴侯府從元遺
山讀書其婦也命二子送行及別求詩以東平二字
為韻孫德詩云峭山一帶傷心碧羨殺孫郎馬首東
公得詩云汝伯年年髮如漆看渠着脚與雲中平孫
竟不永年公之詩亦不知何人藏去閱四十年公簽

汴省分治揚州里人高山甫一日以元詩歸之公喜甚命余紀其事或者謂孫郎詩有羨殺孫郎語不祥如此則詩果有識乎

金朝學士趙秉文奉使西夏中途聞夏主殂而回揚尚書之美以詩戲之云中朝人物謫仙才金卽煌煌使夏臺得句逢人吐珠玉揮毫落紙散瓊瑰一封書代揚州牧半夜雷轟薦福碑窮達書生略相似滿頭風雪却回來

安西府諮議寓庵李顛鄉庭咸陽懷古詩連雞勢盡

壩圖新兀兀宮墻壑渭濱指鹿只能欺二世沐猴那解定三秦倚天樓觀餘焦土落日河山幾戰塵今古悠悠同一轍不須作賦弔前人語意格律俱妙有唐體揚誠齋昇平不在簫韶裡只在邨諸打稻聲即東坡吾君勤儉倡優拙自是豐年歌笑聲

帛丘二詩以塵黃閣侍威顏忽擁高牙出帝閨玉佩乍辭文石陛錦衣重到武丘山仙颺時傍潺湲起珍羽多從杳靄還官大寵深難得暇林泉憶舊是偷閒昔見帛耽耽今為佛子巖雲寒不出寺劔淨未離潭

幽步蘿垂迳寒泉雪閉庵吳都十萬戶烟瓦亘東南
七言丁謂五言范文正公皆有石刻不惟二詩自有
高下然人品志趣皆見之矣

王荆公促織詩祇向貧家促机杼幾家能有一絢絲
可謂有恤人之心然青苗之法和買和催不恤之政
民受其害不能逃君子之責矣其咏商鞅云今人未
可非商鞅商鞅能令政必行荆公之心盡見於此

題洛溪中興頌玉環妖血無人掃世以為張文潛作
實少游筆也時被謫憂畏又持喪乃托名文潛以名

書耳

陸放翁次韵李季章叅政赫香黃閣退朝歸道語時
時正要提九十老翁緣底健一生強半是單栖贈王
伯長主簿詩云學詩大略似叅禪且下工夫二十年
君要親嘗獅子吼法湏盡吐野狐涎幾人錯會先師
話吾背元齊古佛肩天遣放翁窮不死茶山鉢袋未
曾傳觀此詩可易言哉

追懷曾公詩云律令合時方妥帖工夫深處却平夷
老君洞石刻記唐明皇嘗遇老君於此詩云太清宮

關俱煨燼豈亦南來避賊鋒題傳神云白髮蕭蕭雖
儼矣時來或有渡遼詩

李英公平遼東時
年八十餘

公集載獨孤策字景略河中人工文善射喜擊劍一
世奇士也有自峽中來者言其已死感涕賦詩有云
氣鍾太華中條秀文在先秦兩漢間寶劍憑誰占斗
氣名駒竟失養天閑又有懷景略詩喑鳴意氣千人
廢爛雅文流一座傾縮略豈勞平大敵文章自足主
齊盟其人可知惜不成名於世

公集載城南陳翁賣花為業得錢悉供酒家不能獨

飲逢人輒強與共醉一日過而訪之敗屋一間妻子
飢寒以翁已大醉矣大隱者也為賦詩一首君不見
會稽城中賣花翁以花為糧如蜜蜂朝賣一株紫暮
賣一株紅屋破見青天盎中未嘗空賣花得錢付酒
家取酒盡時還賣花春花開豈有極日日我醉終
無涯亦不知天子殿前宣白麻亦不知相公門前築
堤沙客來與語不能答但見醉髮覆面白鬚髭
公示子聿絕句儒林早歲竊虛名白首何曾負短檠
堪嘆一衰今至此夢回聞汝讀書聲

孝宗命洪邁編唐人絕句總萬首賜黃金百兩事見
本集劉翔齋宣城得代以詞別吳履齋末句云想綠
野堂邊劉郎去後誰伴老裴度履齋見之垂淚送金
百兩當日憐才如此

理宗聖學高明尤工於文周漢國公主亮誌銘詔楊
平舟撰挽詩以劉後却為第一孝謹親^顏悅溫恭婦德
修鵲橋方紀節鳶扇忽驚秋魯筆王姬卒湘絃帝子
愁願言寬聖抱况返葢宮遊又賜館恩通內妃堂詔
卜鄰來應自仙佛去尚戀君親望送龍綃濕封崇宦

表新不能秉形管羞愧作詞臣

何探花夢桂劉中齋知舉日及第劉歸贈以詩昆明
灰劫化塵緇夢覺功名黍一炊鍾子未甘南操改庚
公空作北朝悲歸來眼底吳山在別後心期浙水知
白髮門生羞生死青衫留得裏遺尸

中丞容齋徐公人物魁岼襟度寬洪文章吏才筆不
停思題萊州海神廟云龍宮高拱六鰲頭六合乾坤
日夜浮貝殿走珠蛟構室戟門烘霧蜃噴樓中原右
顧真孤島外域東慚更九州咫尺深航倭濊近好將

風浪戒陽侯通之狼山僧舍有墨蓮公肆筆成長篇
尤工綴建臺揚州日確齋荀公雪樓程公校官胡石
塘唱和無虛日亦一時之文會也

左丞崔公仲文題金山詩浩浩長江天際來中流砥
柱獨崔巍風搖萬壑秋聲動潮捲千堆雪浪迴山勢
參差現靈鷲海波遼濶隔蓬萊夕陽不盡登臨意倒
瀉滄溟入酒杯

宣慰耶律柳溪咏剪子詩體出并州性自剛篋中依
約冷光芒對雙環對曲蜂腰細疊刃齊開燕尾張慣

愛分花露雨露偏憎裁錦破死尖可憐成婦寒隄下
一剪衣一斷腸

平陽士友周燾昔仕親揀仕於淮年少工文二十餘
詣浙清舉寓揚旅邸一日諸公以詩言易衆未知周
之才周六鄙衆之作回次韵而成咸敬之循環一理
到如今根本崇陽在抑陰始謹初爻防躄躅同人大
義孰知音歆扶鰲極綱常先識羲皇造化心奧理
直須闕世教凭欄對雨自清吟理義精到屬意尤深
聞兵革中不得其死哀哉

劉太保三奠子念行藏有命烟水無涯嗟去鴈羨歸
鴉半生身累影一事髮成華東山客西蜀道且還家
壺中日月洞裡烟霞春不老景長佳功名肩上鎖
富貴眼前花三杯酒一覺睡一甌茶

李屏山樂府幾番冷笑三閭算來枉向江心墮和光
混俗随机應變有何不可清濁從他醉醒由己多明
識破待用時即進舍時便退雖無福亦無禍 你試
回頭覷我怕不待崢嶸則箇功名半紙風波千丈圖
箇甚麼雲棧揚鞭海濤搖棹爭如閑坐但樽中有酒

心頭無事葫蘆提過

曹東畎赴省陸行良苦以詞自慰其足云春闈期近
也望帝京迢迢猶在天際懊恨這一雙腳底一日廝
趕上五六十里 爭氣扶持我去博得官歸恁時賞
你穿對朝靴安排你在轎兒裡更選個弓樣鞋夜間
伴你

王深落梅詞疎明瘦直不受東皇識留取伴春應肯
萬紅裏怎著得夜色何處笛曉寒無那力若在壽陽
宮裡一點點有人惜蕭秦來梅詞千霜萬雪受盡寒

磨折賴得生來瘦硬儘不怕角吹徹清絕影也別知
心惟有月光元沒春風情性如何共海棠說皆佳作
也二公命意指辭大略相似王四明人有瓦全集蕭
臨江人有大山集

陳藏一雪詞譏賈秋壑沒巴沒鼻霎時間做出漫天
漫地不論高低并小大平白都教一例鼓弄滕神招
邀巽一恁張威勢識他不破至今道是祥瑞最是
鵝鴨池邊三更半夜誤了吳元濟東郭先生都不管
挨上門兒穩睡一夜東風三竿紅日萬事隨流水

東皇笑道山河元是我底

甄龍友題赤壁峨嵋仙客四海文章伯來向東坡遊
戲人間世著不得去國誰愛惜在天何處覓但見
尊前人唱前赤壁後赤壁

北方士友傳沙漠小詞三闋頗能狀其景

瘦藤老樹昏鴉遠山流水人家古道西風瘦馬斜
陽西下斷腸人去天涯

平沙細草斑斑曲溪流淩淩塞上清秋早寒一
聲新鴈黃雲紅葉青山

西風塞上胡笳月明馬上琵琶那抵昭君恨多李
陵臺下淡烟衰草黃沙



